

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 11.10.2012 18.05 Uhr auf 94.0 bzw. 87,7

Leev Toehörers,

wo verrückt Foetballspölen utgahn können, hebben wi Dingsdagabend sehn. Dor föhrt de düütske Nationalmannskupp tegen Schweden mit 4:0 un mutt in de lesd halv Stünn noch 4 Tegotoren hennemen. Wenn man dat neet sülvst in de Kiekkast sehn harr, harr man sowat ja neet lövt. Aber dat maakt de Foetball ja ok so interessant. Man weet noit, wo 'n Spöl utgeiht.

Ok an Dingsdagabend hett Kickers Emden in Spohle tegen de Foetball-Regionalligist SV Wilhelmshaven spölt un blot mit 0:2 verloren, un keen 4 Toren rinkregen. Dat is 'n heel goed Resultaat för Kickers Emden, de ja 2 Klassen deper spölt, meen ik. Wilhelmshaven gung al in de 5. Menüte dör **Evangelos Papaefthimiou** mit 1:0 in Föhren. In de 25. Menüte drückte **Dario Fossi** na 'n Ecke de Ball toe de 2:0 Föhren over de Torstreek.

De Trainer van Wilhelmshaven, **Christian Neidhart**, was an Enn mit dat Resultat toe free. „Ik hebb in de 2. Halvtied söben Maal wesselt, so dat de Spölfluss verloren gahn is, aber wi harren noch mehr Toren skeeten musst,“ meente he na dat Spöl.

Dat Kickers Emden tegen de SV Wilhelmshaven so goed tegenhollen hett, maakt Hopen för de komende Punktspölen.

Kickers hett lesd Weekenenn neet in de Landesliga spölt. Dat ansette Spöl tegen Germania Leer is verleggt worden, wall man upgrund van de Gallimarkt in Leer neet genug Skandarms harr, um villicht Hauereien tüsken Emden und Leeraner Fans toe vermieden. Ja, sowiet is dat al komen, dat in Vörut al offiziell ansette Spölen ofseggt worden mutten.

Ik bün bried, wenn dat ennelk weer maal 'n Punktspöl giff. Kickers hett intüsken al twee Spölen minner, as de anner Mannskuppen in de Landesliga. Irgendwann mutten de nahaalt worden. Frei mi up Sönndag, wenn um Klock drie in dat Oostfreesland-Stadion tegen de SSC Dodesheide anfleit word. De Mannskupp steiht wall up 'n Ofstiegsplatz, man in de Landesliga kann elk elk slaan. Dorup deit Trainer **Yasin Turan** sien jung Mannskupp seker heel besünners henwiesen.

Würr mi freien, wenn wi uns Sönndagnamiddag bi dat Spöl in Emden sehn würren.

So, nu noch as alltied, 'n kört Foetballwitz.

Bayer Leverkusen hett 'n neei Elektrowaag mi 'n Computer anskafft. Manuel Friedrich stellt sük as Erster drup. De Waag wisst an: „75 Kilo, optimaal.“ Dorna Stefan Kiesling: „Dree Kilo toe licht.“ Ennelk will ok de ehemaalige Manager Rainer Calmund dat neei Stück utproberen: De Waag wisst an. „Bitte, neet in Gruppen up de Waag stellen!“

Leev Toehörers van Radio Oostfriesland,
dat was dat weer maal för disse Week.

Ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.